

2018

मारवाड़ी तिमाई पत्रिका

अपौरौ मारवाड़, अपौरौ बौली

जद ताई कोई कौम नी करो हो जटे ताई थोने बो कौम
घणो दोरो लागे है- **नेल्सन मंडेला**




nirmaan
empowering communities

संपादक

निरमाण सोसायटी-ओसियाँ



भामासाह योजना

भामासाह योजना लुगार्डियो ने ससक्त बिणावणे वास्ते मुख्यामंतरी वसुंधरा जी ने आ योजना सरु करी। इण योजना ऊ सरकारी योजना रा रुपिया स्त्रीदा लाभार्थी रे खाते मे आवे है। इण तरिके ऊ आ योजना रिसवत खोरी अर भरस्टाचार ने बंद करण वास्ते सरु करी है।

इण योजना मे सरकार एक भामासाह कारड देई है जको लुगार्डि रे नोम रो हूई है।

फेमिन, छातरवरती, रासन री दुकोन ने १५ दिसम्बर २०१४ ऊ भामासाह मे जोड़ दी है। इण योजना रो मेन उदेस्य पारदर्शी तरिके ऊ राजस्थान रा मिनको रा बैंक खातो मे सरकारी अर गैर सरकारी योजना रो लाभ स्त्रीदो उन्ने मिळ सके है।

भामासाह योजना री खासियत

1. सरकारी लाभ स्त्रीदो लाभार्थी रे खाते मे आवेला, रिसवतखोरी बंद हो जाई है।
2. सरकार री योजना रो पूरो लाभ स्त्रीदो गरीब लुगार्डियो मिळे ला।
3. राजस्थोन में इण योजना ऊ डेढ लाख लुगार्डियो रा खाता बैंक मे खोलिया है।
4. इण योजना मे खोड़ा पोंगळा अर पढणाळो रे वास्ते एक नारो कारड बणायो हे। जिका आपरे घरो स्राथे नी रेवे है उन्ने ओ देई है।
5. भामासाह कारड ऊ गरीब परिवार आळो ने ३०००० हजार ऊ ३००००० तोई रो ईलाज फिरी है।

भामासाह रे लायक कुण है।

1. आवेदक राजस्थोन रो होवणो जोईजे हे।
2. आवेदक रो भामासाह कारड वास्ते भामासाह बैंक खातो होणो जरूरी है।
3. भामासाह कारड सिरफ राजस्थोन मे इज मोनिजेला।
4. बीपीएल आळा ईण योजना रे लायक हे।

भामासाह योजना रे वास्ते जरूरी कागद

- * पैचाण पतर
- * आधार कारड
- * रासन कारड
- * पेन कारड
- * पोणी बिल, लाईट बिल या टेलीफोन बिल
- * छोटकियो फोटू
- * बैंक खाता

भामासाह योजना मे नोम किकर जोड़ो

भामासाह ओनलाईन व ओफलाईन दोई तरिको ऊ नोम जोड़ा सको हो।

मुहावरे

- छाती रा छोडा लेवणा- दुख देवणो- टाबरो ने कितोइ समजावो पण छाती रा छोडा लियो बिनो नी मोने।
- स्लाडी बारै करणी- नाह जावणो- भाग जाना- घणा मिनको ने देख अन छोरो तो स्लाडी बारै करी।



**1. आपरे जीवन रो जकसे तै करणे,
अर झेंग दुखा विचारणे मे आपरा
दिमाक ऊ निकाल वे, इमे ई थोरी
जीत है- स्वामी विवेकानन्द**

**2. जेड़ो थे झोचो हो ऐड़ा ई बण
जाओ हो- गौतम बुद्ध**

भजन (गणपति वंदना)

जाग जाग म्हारा गणपति देवा, लोम्बी सूंड रखवाळा जी हे...

कंकू केसर रा तिलक चडावा, सिवरे सक्ति वाळा जी, म्हारा गणपति देव रखवाळा जी।

डावी भुजा पे सुंड सोभित है, गळे फूल माळा जी, रिद्धी-सिद्धि नारी थोरे संग बिराजे, आसा पुरण वाळा जी हे...म्हारा गणपति देव नखराळा जी।

बरमा सिवरे विष्णु सिवरे, सिवरे संकर देवा जी,

देव पढंता बरमा सिवरे, सरस्टी उबावण वाळा जी देव बडा मतवाळा जी।

चन्दो सिवरे सुरज सिवरे सिवरे नवलख तारा जी, इन्द्रका भोम इन्द्रराजा सिवरे जळ बरसावण वाळा जी, देव बडा गजानन्द मतवाळा जी।

राजा सिवरे परजा सिवरे सिवरे जोगी तपधारी जी,

ऊठ परभात बोपारी थोने सिवरे हे...रोजी पुरावण वाळा गणपति देव मतवाळा जी।

नाथ गुलाब जी पुरा मिळिया, किनी चरणो री सेवा जी

भवानी गुरु सतगुरुजी रे सरणे हिरदे राखो गणपति देव बडा मतवाळा जी।

कहावते

1. केवे जको करे कोनीं, करे जको केवे कोनीं।

खुद करे जको,कोयां रे भरोसे रेवे कोनीं।

2. गुरू बिना ग्यान आवे कोनीं, लूण बिना धान भावे कोनीं

बेटा बिना भऊ आवे कोनीं।

चुटकला (ग्वारफळी)

1. ग्वार फली ₹100 rs किलो... सोचो.....

पढीयोडी हुवती तो किता भाव खावती। काळी मिर्च Rs1000 में एक किलो... सोचो अर बा गोरी होवती तो किता भाव खावती.....

बेरोजगारी

2. 5वीं, 8वीं, 10वीं, 12वीं फेल छोरा उदास नी हो।

म्हाऊ आकर मिळे। दो चीजो साथे जरूर लावे।

एक तगारी, एक फावडो...मोती.ठेकेदार।

गौत (बालम नखरालो)

टिकट कटायो पाली रो बो जा पहुंच्यो अजमेर, बालम नखरालो।

फोन लगायो जैपर घंटी बाजी जैसलमेर बालम नखरालो।

हारे बालम नखरालो, घूम्यायो बीकानेर बालम नखरालो।

देऊं ओलबो छेलो म्हांनें बातां सु बिलमावे। केऊं टीकी ल्यावण रो रबड की टूटी ल्यावे।

पाव मंगाऊं पालको लियावे ढाई मेर, बालम नखरयालो।

हारे बालम नखरालो, घूम्यायो बीकानेर बालम नखरयालो।

जीमणं नें बैठे तो छेलो नखरा घणां दिखावे।

पतला फलका साग सांतरा पापड च्यार तलावे।

खाटी लागे राबडी इनें काचा लागे केर, बालम नखरालो।

हारे बालम नखरालो,घूम्यायो बीकानेर बालम नखरालो।

गलियां मांही फिरे डोलतो रात पड्यां घर आवे।

सोवे नीं सोबादे म्हांनें सारी रात जगावे।

मन री बात सुणाऊं तो सो ज्यावे मुंडो फेर, बालम नखरालो।

हारे बालम नखरालो, घूम्यायो बीकानेर, बालम नखरालो।

कपडा पेरे ऊजला होंडा पर चढकर जावे।

साथीडां रे सागे छेलो फिल्म देखकर आवे।

गुटका खावे फिरे थूकतो घर में च्यारुंमेर, बालम नखरालो,

हारे बालम नखरालो, घूम्यायो बीकानेर, बालम नखरालो।

टिकट कटायो पाली रो बो जा पहुंच्यो अजमेर, बालम नखरालो।

फोन लगायो जैपर घंटी बाजी जैसलमेर, बालम नखरालो।

हारे बालम नखरालो,घूम्यायो बीकानेर बालम नखरालो।

कहाणी (सरग जात)

एकर एक गोव रे माई एक मिनख एक बोणिये रे घरे गियो हो। उठे जा'न सेठोणी जी ने हेलो करियो के पोणी पावो तो। सेठोणी जी बारे आई पोणी रो लोटो लेन आ'न पुछियो के कठैऊ आया हो हो अन कई जात है थोरी। मिनख केयो के सरगरा हो मेतो। सेठोणी जी केयो के थे सरगरा हो कई भगोन रे घरू आयो हो। मिनख ने ठा पड़ गियो के सठोणी जी भोळा इज है। जणौ केयो के हो भगोन रे घरू आयो हूँ। सठोणी जी बोळ्या के मोरे ई हमार नणद बाई चलगिया हॉ। बे थोने मिळिया हॉ के को मिळिया हॉ नी। जणौ मिनख केयो के मिळिया तो हॉ पण उओरे कपड़े लते री अन खावण पीवण री कमी घणी है जको तंग घणा रेवे है अन फाटोड़ा गाबा पेरे है अन मने केयो हो के जावो जणो म्हारे भोजाई ने केजो जको बे जीव रा घणा सकरा है अन उओने केजो जको बे म्हारे गाबा लता मेले जियो ईण वास्ते में थोरे खन्ने आयो हूँ। सठोणी जी आपरे घर रे मौईनू कपड़ा अन खावण पीवण रो सम्मोन अन रुपिया दूजा उण मिनख ने दे दिया। बो मिनख ले परो अन गियो परो। जेड़े अन सेठजी घरे आया अन के सठोणी जी दिन आळी बात केयी के आज सरगरा मिनख आया हॉ जको में तो उओरे साथे बाईजी रे वास्ते कपड़ा अन खावण पीवण रो सम्मोन मेलियो हो। सैठ केयो के केड़ा आया हॉ अन थू सैंग सम्मोन दे दियो हो इयो कर अन सैठ ऊट लेन उण मिनख रे लारे गिया परा सम्मोन पाछो लावण वास्ते। मिनख सठो ने आवता देखिया अन सोचियो के सैठ है तो सागेई अन हमे सम्मोन तो पाछो ले जाई। इयो कर परो अन बो एक खेड़ी रे माथे चड गियो। सैठ ऊट खेड़ी रे हेटे रोक अन सेठजी खेड़ी माथे चड अन ढुका जेड़े बो मिनख ऊट रे माथे कूद परो अन ऊट लेन गियो परो सैठ मूंडो उतार अन पाछा घरे आया। सैठोणी जी पुछियो के सरगरा मिळिया हॉ कई थाने। सैठ केयो के मिळिया तो हॉ अर केयो के बाईजी रे आवण जावण वास्ते साजन नी है जणो में तो ऊट ई ऊओने देन आयो हूँ।



तुळछी रा फायदा

1. तुळछी मारवाड़ रे माई लगभग हरेक घर में होवे हैं। तुळछी रा फायदा घणा होवे हैं। तुळछी घणा बैमारियो री एक दवा हैं।
2. मेह री मौसम में रोजिना तुळछी रा पोच पता खावणे ऊ सी ठण्ड को लागे नी। तुळछी रा पता चबावणे ऊ छाला को नी होवे हैं।
3. दाद, खाज, चोमड़ी री कोई बैमारी तुळछी रा पता बोट अन उण माते लगावणे ऊ बे तकलिफो बेगी ठीक हो जावे हैं।
4. सा री तकलिफ में तुळछी रा पता काळे लुण रे साथे सोपारी रे आळे दई मुण्डे में राखणे ऊ अरोम मिळे हैं।
5. तुळछी रा पता बादी में स्नेक अन लुण रे साथे खावणे ऊ धोई अर साद चिपणो ठीक हो जावे हैं।
7. रातिन्दो अर ओखियो बळती होवे जणो तुळछी रे पतो रो रस निकाल रात रा ओखियो में घालणे ऊ ओखियो ठीक हो जावे हैं।

बणावण आळा:-

गंगाराम अर रतन लाल योगी

मदत करणाळा:-

मुकेश कुमार योगी अर कविता योगी

पतो

निरमाण सोसायटी

फ्लेट नम्बर 3 तीसरी मंजिल गुलाब कोम्पलेक्स

तहसील रोड सच्चिदाय हेण्डलूम के पास औसियाँ

जोधपुर (राजस्थान) - 342303

फोन नमर - 02922-274017